

Inatsisartut suleriaasianni § 37 naapertorlugu matumuuna Naalakkersuisunut apeqqutit imaattut saqqummiuppakka:

Apeqqutit:

- 1. Naalakkersuisut Kommune Kujalleq pillugu tusagassiuutitigut nalunaaruteqarlutik oqaatigisimavaat, kommunip ulluinnarni allaffissornikkut aqunneqarnera ima ilungersunartigimmat allaat meeqqat inuunerat peqqissusaallu navianartorsiortutut oqaatigineqarsinnaallutik. Naalakkersuisut qanoq iliuuseqarniarnerpat, meeqqat inuunerat aamma peqqissusaat qulakkeerumallugu?**
- 2. Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. 14 af 6. juni 2016 , tassanimi Inatsisartut Peqqussutaat § 7a Naalakkersuisut kommunit isumaginninnikkut maleruaqqusat toqqammavigalugit ingerlatsinerannik atorunnaarsitsissallutik aalajangersinnaanerannik pisinnaatitsissutitalik naapertorlugu, meeqqat inuunerat peqqissusaallu annaanniarlugit Naalakkersuisut iliuuseqarniarpat?**
- 3. § 7a naapertorlugu iliuuseqartoqassappat, Naalakkersuisut matumuuna nassuiaateqaqqussavakka tulluuttut naapertorlugit; Inatsimmi § 7b, § 7c aamma § 7d naapertorlugit Naalakkersuisut qanoq aaqqiissuteqarniarpat?**
- 4. Taamatuttaaq Tasiilami nakkutilliinerup kingorna ilungersunarluinnartumik nalunaarusiortoqarnikuvoq, meeqqat 500 sinnerlugit pillugit ernumassuteqartoqarluni. Naalakkersuisut Tasiilami nakkutilliinerup kingunerisaannik nakkutilliinermik allamik malitseqartitsisoqarnikuua, soorlu Kommune Kujallermi pisumut assingusumik?**
- 5. Tasiilami pissutsit Kujataani pissutsituulli ernumanartigippata, Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. 14 af 6. juni 2016 atorlugu, § 7a naapertorlugu Naalakkersuisut iliuuseqarniarpat?**
- 6. Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. 14 af 6. juni 2016 §§ 7a, 7b, 7d aamma 7d naapertorlugit Kommune Kujalleq Kommuneqarfik Sermer-soorlu eqqarsaatigalugit iliuuseqarnianngikkunik, suna tassunga tunngavilersuutava?**

7. Isumaginnittoqarfiup aqunneqarnera aaqqissuussaanelu pillugit Inatsisartut peq-qussutaata allanngortinneqarneranik Inatsisartut inatsisaat nr. 14 af 6. juni 2016 naapertorlugu Naalakkersuisut illoqarfiit pineqartut marluk pillugit iliuuseqarnianngikkunik, Naalakkersuisut qanoq iliorlutik meeqqat ulorianartorsiortut inuuneranik peqissusaannillu qulakkeerinninniarpat??
8. Danskít Naalakkersuisui danskít Aningaasaqarnermut Inatsisaat 2017-imut atuuttoq aqqutigalugu 2,5 mio. kr. -inik ukiumoortumik, ukiuni 4-ni atuuttussamik illukartitsimapput, aningaasat illikartinneqartut qanoq aqunneqarnissaat pillugu isumaqatigiissusiortoqarpa?

(Inatsisartuni ilaasortaq, Martha Lund Olsen, Siumut)

Tunngavilersuineq:

Naalakkersuisut tusagassiuutitigut nalunaarumminni februarip pingajuanni 2017-imi Kommune Kujalleq pillugu ilaatigut imatut oqaaseqarsimapput;

”Ilanngullugu oqaatigineqassaaq isumaginninnerup iluani immikkoortortanik nakkutilliisut paasisimammassuk, kommunip meeqqanik inuusuttunillu sullissinerani annertuutigut amigaateqartoqartoq, meeqqat atugarliortut inuunerannut peqqissusiannullu toqqaannartumik kingunerlussinnaasunik. Taamaammat isumaginninnerup iluani immikkoortortanik nakkutilliisut, suliassaqarfiup qanimut malinnaaffigineqarnissaa siunertaralugu januar 2017imi Kommune Kujallermut immikkut ittumik nakkutilliiartorput.

Pissutsit-uku uppersaatissartaat qulaani taaneqartut tunngavigalugit kommuni ajornartorsiutinik nassuerutiginnequllugu, aaqqiissuteqarnissamillu suleqatigiittoqaqqullugu kaammattoriga.”

Naatsorsuutigivara apeqqutikka ullut suliffiusut qulit iluanni akineqarumaartut.